

Gradnja Hidroelektrane Vranduk, prve u BiH nakon 40 godina, počela je jučer! Prve građevinske mašine izašle su na gradilište novog razvojnog projekta i počele s radom na proširenju pristupnih puteva, promjeni toka rijeke Bosne i rušenju objekata za koji je eksproprijacija davno završena. Reporteri „Dnevnog avaza“ bili su jučer na licu mjesta, gdje smo svjedočili prvim iskopima.

Senad Salkić, direktor za kapitalne investicije „Elektroprivrede BiH“, pozdravio je izlazak mašina na teren te za naš list pojasnio da će krajem avgusta biti upriličena svečanost kojom će se ozvaničiti početak radova.

- Dotad će dobar dio posla biti urađen, govorim o pripremama, naravno. Potrebno je sada promijeniti tok rijeke, a najvažnije je da su mašine izašle na teren. Znam da su ljudi nestrpljivi, da ne vjeruju u najave, izjave, ali kada su mašine na terenu, onda svi mogu vidjeti da se radi o ozbiljnom projektu i o ozbiljnom pristupu - kaže Salkić.

Poštujući sve procedure, izradu glavnog projekta i njegovu reviziju, gradnja HE Vranduk postala je i jedan od projekata o kojem se svakodnevno razgovara i na kojem se svakodnevno radi u EPBiH.

- Nama je ovaj projekt bitan i mi smo od početka pristupali sa stavom da se konačno krene u konkretnu realizaciju, a da to ne ostaje samo mrtvo slovo na papiru, kao što je bilo do sada - dodaje Salkić.

Inače, radi se o gradnji hidrocentrale koja će biti u vlasništvu EPBiH. Ugovor o gradnji potpisan je početkom godine s čelnicima konzorcija kompanija „Strabag“ i „Končar“, koji su dostavili najbolju ponudu za ovaj veliki posao.

Potpisan je ugovor po sistemu „ključ u ruke“, a obuhvata izradu projektne dokumentacije, proizvodnju, isporuku i montažu opreme, izvođenje građevinskih radova, testiranje i puštanje postrojenja u pogon.

Nakon završetka projektne dokumentacije, rok za okončanje radova je 46 mjeseci.

Prema najavama firmi koje su dobile ovaj posao, jezero Vranduk bit će dugo šest kilometara, dok će visina brane iznositi 19, a dužina 120 metara.

izvor: m.avaz.ba